

atque INDRÆ similes, celebrabant virginum juvenumque nuptias, prout ipsorum dignitatem decebat.

54. RAGHUIS soboles duxit virginem e terra natam, LAKSHMANAS ejusdem sororem natu minorem URMILAM; utriusque fratres juniores, eximie splendentes, gracilem utramque KUSADHVAJÆ filiam.

55. Tres illi regis filii una cum quarto, cum novas uxores duxissent, splendebant, tanquam quattuor ejusdem contra inimicos subsidia, prospere cecidentia, scilicet reconciliatio, dona, discordiæ excitatio et coercitio.

56. Illæ regis filiæ per hos regis filios, atque hi per illas vota sua expleta videbant; eratque conjugum cum uxoribus congressus, sicut nudæ vocum formæ cum suffixis conjunctio.

57. DASARATHAS, postquam quattuor filios suos ibi cum uxoribus conjunxerat, atque *Mithilæ* regem dimiserat, tribus itineribus in suam urbem rediit.

58. Interdum in itinere venti ex adverso flantes, atque vexilla arborum instar commoventes, exercitum ejus vehementia sua vexabant, veluti planitiem fluvii undæ, ripam transgredientes.

59. Deinde conspiciebatur sol, terribili halonis orbe cinctus, veluti delapsa serpentis, a GARUDA occisi, gemma, ejus corpore circumdata.

60. Plagæ cœlestes, cum vulturum alis, quasi subcanis cincinnis, atque nubibus vespertinis, quasi vestibus sanguine madidis, veluti mulieres menstruorum tempore, adspici haud poterant.

61. Lupæ quoque, regionem, ubi sol commoratur, aggressæ, horrendo modo ejulabant, ac si excitare vellent BHRIGUIDEN, *Kshatriyorum* sanguine sacrificia Manibus peragere adsuetum.

62. Terræ dominus officii gnarus, ventum contrarium aliaque præsagia mala animadvertens, de ominibus sinistris avertendis magistrum suum interrogavit, qui, bonum exitum promittens, sollicitudine eum liberavit.

63. Statim apparuit ingens splendor, oriens in exercitus fronte, quem denique milites, cum oculos abstersissent, viri forma præditum cognoscebant.

64. Sortem patriam gestans, filo sacro notatam, maternamque, ingenti